

Ohrenschmaus – Literatur

Geschichten aus Simmering

10 Jahre Integrationsversuch

27

Liabe Leit, I wü eich do a poar Gschichten über mei Integration in Simmering dazön.

Anfang hat ois 1997, da woit I allan leben und man hat da a gschaut, dass I a nette Wohnung krieg, die I ma a natürlich a leisten kann.

Da samma auf Simmering kumma, weil des woar ned weit weg von mein Oarbeitsplatz, und a Bim, Autobus, U-Bahn woar ois in da Nähe.

Mit meine Eltern und meine Gschwister hob I ja an guaten Kontakt ghobt, der Jammer woar nur, dass wann I ma was Neichs kauft hob, dass ma des imma obetteln woitn.

Sie hams sie bei mir überhaupt oft gern bedient und si was zoin lassen von mir.

Stellts eich vuar, I foar nach Kärnten zwei Wochen auf Urlaub. Natürlich hob I Blumen ghobt, die miassn ja gossn werdn, der Briafkasten muss a gleert werdn, weil man sagt ja, dass die Einbrecher drauf schau. Jetz hob I meine Gschwister gfragt, ob's in die 14 Tag auf mei Wohnung aufpassen kennan. Na I hob meine Wunder dalebt, des kann I eich sagen ...

8000 Schilling Telefonrechnung und kana will telefoniert hobn. Gschlafen muss a wer da haben, weil des Bett und ois woar komplett durcheinand. I bin eh so a Genauer und mog die Unordnung eh ned! Auf jeden Foi woars des letzte Moi und gred hob I mit earna a lange Zeit nix mehr ...

Jetz dazö I eich von mein Nachboarn, des woar der Herr Koarl. Der Herr Koarl woar so 40, 45 Joar oid, goarbeit hot a nix, im Wiatshaus woar er a gern. Und oft woar er a dann bsoffin und hat dann a ka Göd ghobt. Was dem fiar Gschichten eingfoin san, dass der zu an Göd kummt, des glaubts ned ...

Allerhand Flohmoarktzeig, oder was er so gfundn hat am Sperrmüll, woit er ma vakaufen.

Oide Biacher, CDs, oft woarn de a zakratzt. I hob oft ned gwusst wie I mi da wehm soitt, weu des Klumpatt hob I ja ned brauchen kenna. Jetz hot er hoit drängt: „Kauf ma des ob, I brauch des Göd ...“ I hob erm gsagt: „I muss jetz gehen, pfiaati Gott, I überlegs mir!“ Des woar mir ja schon peinlich. Und I bin dann in mei Wohnung ganga, de woar ja nebn seiner.

Nach 10 Minuten, stellts eich vur war er scho wieder da und hot mi gfragt ob ichs ma schon überlegt hob ... Sag I erm: „No ned!“ I waas eh, er woit scho wiader ins Wiatshaus gehen und braucht jetz dringend a Göd. Egal, I hob die Musik laut aufdraht, und hob dan wie wann I erm ned hearat dan. Owa I sag eich, da Koarl, der hot ned leicht aufgeb'n ...

In da Frua bin I ganz leise zua Tür, wei I hob ja in de Oaweit müssn. Wie I so ausse geh, eh ganz leise, reißt er sei Tür auf und sagt „Morgen Woifgang. Host das da scho überlegt?“

I hob erm gsogt I muss schnö zum Bus, wir redn am Abend drüber.

I sag eich, da hob I mi nimma so guat gefühlt mim Koarl, des woar mir peinlich. Er woar ja ned schlecht da Koarl. I hob amal ka Guathabn ghabt im Handy und hob gsagt: „Koarl, kann I kurz bei dir anruufn?“ I hob mi eh kurz ghoitn, wei des duat ma ja ned, bei andre Leit lang telefoniern. Und zoit hob I erm des a imma! Er woar hoit sehr teuer, wei unter 5 Euro woar da nix zmachn. Er hot mag sagt er hot an teuren Anbieter. I hobs erm eh ned glaubt. Zum Glück woars eh ganz selten.

Im Wiatshaus, in da Näh von meina Wohnung, da hob I ja ganz vü Leit kennt, wei hin und wiader bin I a zum Wiatn ganga. Der Koarl, der woar ja oft durt, I glaub jeden Tag. Genau kann I des ned sagn, wei I woar ja ned jeden Tag durt. Oft is erm des Göd ausganga, I hob erm a da und durt amoi was burt. Stellts eich vuar der Kerl hot ma owa oft nuar de Hälfte wieder zruckgebn. I man sicha, hot er ma oft was zoit a, wan er a Göd ghobt hot, und des woar ned oft.

De Kellnerin, was bei dem Wiatn woar, des woar a Rothaarige. Mei Liaber, de hot a gwusst, wia man mit de Gäst umgeht! I hab des oft beobachtet. Desto mehr ana trunken hot, demnach hobn se a de Preise verändert. Oft hob I mitzöhlt ... de hot des kenna und hot a glei mehr grechnt. Drei Bier hob I moi zöhlt und an Schnaps und grechnt hots glei vier Bier, I hob da glei aufpasst! De ... Karin hots ghaasn ... naja lang woars eh ned da wei de hobns dann eh glei ausseghaut, hobns gsagt. Dann woar da da Martin. Na, des woar a Düsn, der woar so 30 Joar, hot er ma gsagt. Stellt seich vur, der hot ned amoi an Führerschein ghobt und is dauernd Auto gfoarn. A mit a poar Bier! Mi woit er a mitnemma, owa I in ja ned bled und foar mit so an mit.

Schlägerein hob I a dalebt wei bei dem Wiatn hobns oft Koarten gspült. Und wann dann ana ka Göd ghobt hot und ned seine Schuidn zoit hot, dann hots a blaues Aug a schnö gebn. I hob nie gspült, des fang I ma ned an, da kannst nur draufzoin, I hob eh gnua gsehn.

Da hots in mein Haus an Herrn Kuat gebn. Der hot obn am Stock gwohnt mit seina Frau. Des woar der netteste von olle ...

Er woar krank, hot er ma dazöt, vielleicht woar er grad deswegen so nett. Er hot mi oft mitgnumma in de SCS, der hot nämlich a a schene DVD-Sammlung ghobt. DVDs des is ja mei Spezialgebiet, miassts wissen und min Herrn Kuat hob I mi da a guat austauschn kenna. Er woar ja Tapezierer-Master, scho in Pension. Hot owa scho no fiar Leit hin und wiader gorweit, wei des Göd hot er ja a brauchn kenna.

Bese Leit hots hoit a gebn. Da schau I amoi Fernsehen, I hob ja des Kabelfernsehn ghobt, auf amoi hob I ka Bild mehr ... I hob ma denkt, naja da is hoit a Störung, mit dem Kabel, owa weils scho Abend woar hob I hoit nix mehr dan. Am nächsten Tag woars des selbe, da hob I hoit wen hoin miassn. Der Techniker hot si des angeschaut und hot ma gsagt: „Ja mei liaber Herr, des hots si wer ausborgt von ianer. Se kennan ja den anzagen wenna woiln und de Polizei hoin.“ Des woit I ned, dann hast wiader a Streiterei. Owa, des is ma scho langsam z'vü wordn, des Ganze. Ja, wie soi ich eich's sagen ... I hob mi nimma wohl gefühlt.

I bin jetz wiader zruck ganga in mei oide Einrichtung und da hob I a klane Wohnung und da geht's ma wirklich guat, da gibt's kane Bsoffenen und kane Horrorepreise fiars Telefon, okaufn muss I a kan wos und vü Freund hob I. I bin froh, dass a de Betreuer des damals guat erkannt hobn, dass ma des scho z'vü is.

Owa Leidln, I sog eich wos ... I kenn mi in Simmering jetzt aus! Ich weiß wia der Hase läuft, wia man sche sagt. Wer weiß, wer weiß, vielleicht lass I mi irgendwann wiader auf so a neiche Integration ein, und dan suach ich ma meine Freund selber aus ...

Eicher Woifgang